

ikajuttigedluta sanginiKatsiavugut.

Labradorimi Inuit Nunamik Satusaijet AngiKatigegutinga Atitâttauvuk

Nain, Newfoundland Labradorilu (Januar 21, 2005)- Ullumi, atitâgijuni Nainimi, Newfoundland Labradorilu, kiggatuttingit Labradorimi Inuit katutjiKatigenninganit (LIA), kavamanga Canadaup, ammalu kavamanga Newfoundland Labradoriullu atitâgivot Labradorimi Inuit Nunamik Satusaijet AngiKatigegutinganik (AngiKatigegutik). kiggatuttigisimajanga LIA-kut AngajukKânga William Andersen III. kiggatuttigisimajanga kavamanga Newfoundland Labradoriullu AngajukKâsuak, Nittunattuk Danny Williams ammalu Nittunattuk Tom Rideout, AngajukKâk, kamajiudluni NunaKakKâsimajunik. kiggatuttigisimajanga kavamanganit Canadaup Nittunattuk Andy Scott, Aulatsijujuk Inuligijinni Taggâni Pivalliatunitsanginni ammalu Federalini kiggatuttiujuk Allangajunik Metis ammalu Asinginnik Allaujunik.

Ullusiulauttut kiggatuttet pitsiadlutik nâjidlutik 28-ni jârini suligijausimajumik katimajijunut, pigiasisimadlutik 1977-mi piulijausimatillugu uKausiujuit namminiuninginnut LIA-kunut. Una AngiKatigegutik pivitsaKattisivuk Labradorimi Inunnik uKautaujuit pivitsagijangit iluani nunalinnilu taggâni Labradorimi.

AngiKatigegutik, nutângulittuk angiKatigegutik, sivullipauvuk taimaittodluni Nunalinni Canadami.

AngajukKânga Labradorimi Inuit katutjiKatigenningani, William Andersen III, uKajuk "Labradorimi Inuit Nunamik Satusaijet AngiKatigegutinga sakKititsiniakKuk sulijumik ammalu tukiKatsiajumik ikajotitsatinnik ilonnata – Labradorimi Inuit, Newfoundlandait ammalu Labradorimiut ammalu ilonnatik Canadamiungujuit. PivitsaKattisijuk sulijumik pivitsaujunillu ammalu sakKititsijuk tukisinatsiajunik sivunitsatinni. PivitsaKattisiniattuk piguvalliaKulluta ikajuttigennikut pigiasisimajattinik suliatSanik tugâllutik atuttausiagajattunik pivallianikkut, kenaujaliunnikut piguvallialutik ammalu maligatsatigut."

AngajukKâk Scott uKajuk, "Sivullipaujuk ullumi angiKatigegutik Canadami nalunaititsivuk angmatauninginnik nutât piusitsaujuut ikajuttigennikut akungani Inuit Labradorimiut, Newfoundland Labradorilu, ammalu Canada. Una AngiKatigegutik pivitsaKattisituinnalulângilak sulijumik nunait atuttaunitsanginnut atitsangillu, kamaKattaniattuk pivitsaujunik kenaujaliugiamut pivallianitsanginnut Inuit Inongituillu adjigetumik. Inuit Labradorimiut mânnaujuk sakkusaKalittut pigutitsivalliagamik namminik kavamaminik ammalu aulatsilualillutik Kanuk piusiugumajunik attutauKattatunik nunaliujuni, Kaumanitsamik sivunitsatini.

AngajukKâsuak Williams uKajuk, "Atitâginik angiKatigennimik, sivullipauvuk nunait satusattausimajuit angiKatigegutinga pijagettaunitsanga Newfoundland Labradorimi piusiuuvuk Labradorimi Inunnut, prâvinsimut ammalu ilonnainut nunatsuami. Una AngiKatigegutik tukisinattunik sakKititsiniakKuk nunait namminigijaunitsanginnut ammalu aulatsigiamut pivianattunik, pigunnatitsidlutik Labradorimi Inuit pigunnaKullugit kenaujatigut pivalliagamik pivitsaujunik ilingajunik ilusituKangita illigijauninginnut. Pijagennik tamatsuminga nunamik satusaijet angiKatigegutinganik sakKititsiniakKuk makitatsiajumik avatiujumik kenaujaliugiamut ikajuttaunitsangit Labradorimi Inuit ammalu ilonnatik Newfoundlandait ammalu Labradorimiut. kavamanga Newfoundland Labradoriullu pisittungituk takutitsigiamut tâtsuminga nutâmik piusiuKatigegasualittumik Labradorimi Inunnut ammalu kavamanganut Canadaup."

AngajukKâk Rideout uKajuk, "Una kavamak pisittungituk kajusititsigiamik Labradorimi Inuit Nunamik Satusaijet AngiKatigegutingata Maligatsanganik itsivaKatigeniammata ukiatsângulauttumi kavamait Illusuangani, ammalu ullumi nalunaititsivuk asianik pimmagiujumik piusiuujumik inoset maligatsanelittilugit. Namminik kavamaKagamut ilumiutaKavut angiKatigegutimi pigunnatitsiniattut Labradorimi Inuit piguvalliaKullugit inosiKatsialutik nunalinni âkKisuinikkut imminik sivulliutigumajaminik ammalu âkKisuillutik imminik akKutitsaminik sivunitsamini ammalu kavamanga Newfoundland Labradoriullu pisittungituk ikajutsigiamik Labradorimi Inunnik ingiggagasuaninginni nutâmi piusitsaujumi inogusimmini."

Labradorimi Inuit katutjiKatigenninga kiggatuvuk 5,300-tisiammaginnik Inunnik Kablunângajunillu (immigojuut ilangit Inuit kinguvângit) nunaKadlutik tallimani satjugiami nunaliujuni (Nainimi, Hopedale, Makkovik, KipukKak ammalu Rigolettimi) ammalu Upper Lake Melville nunalinginni Newfoundland Labradorimilu.

AngiKatigegutik âkKisisimavuk tukilinnik nunait namminigijaunitsanginnut, pivianattuit atuttauKatigetillugit ammalu namminik kavamaKagamut.

AngiKatigegutik pigunnatitsivuk sakKititsigiamut Labradorimi Inuit Namminiugumajanginnik Nunanik (Satusattaugumajunik Nunanik) katidlugit anginilet 72,500 square kilometres (28,000 square miles) nunait taggâni Labradorimi, ilauKatautillugit 15,800 square kilometres (6,100 square miles) Inuit namminingit nunait, Kaujimajaujut Labradorimi Inuit Nunangit. Satusattausimajut Nunait ilautitsigivut atajunik Imappimut Nalunaikkutanganut 48,690 square kilometres (18,800 square miles). AngiKatigegutik pivitsaKattisigivuk sakKititsigiamut Torngait KakKasuanginni Sagvataumajunik Nunanik, anginilet 9,600 square kilometres (3,700 square miles) nunait iluani Satusattausimajuit Nunani.

Atâni AngiKatigenniup, kavamanga Canadaup aittuilâkKuk \$140 million dâlanik Labradorimi Inunnut, ammalugiallak \$156 million dâlanik pitsatunittâgianga AngiKatigegutik.

Namminik kavamaKanik ilumiutaKavuk AngiKatigennimi pivitsaKattisidluni sakKititausimajunik Nunatsiavut kavamangani, tallimait Inuit nunangita kavamangit ammalu Inuit nunalinni kuapaujut kiggatujutsautillugit Inunnik nunaliujunik silatâni Satusattausimajuit Nunait. Ilonnatik kavamaujut maligatsatigut kamagiaKavut ammalu kenaujatigut angnigusupviugialinnik. Nunatsiavut kavamanga maligatsaliusongulâlikKuk ilingajunik Inunnut Labradorimi Inuit Nunanginni ammalu Inuit nunalinginni pitjutigillugit ilikKusituKangit uKausingillu, ilinnianik, sukkutailinik ammalu inuit kamagijaugiaKaningit. Nunatsiavut kavamanga maligatsaliusongugivuk suliaKapvilagingani Inuit maligatsanginnik ammalu sakKititsilutik pigiaKagutik ilusitsaujunik, ilautillugit Inuit maligatsangita kamajitsangit ammalu Inuit idluatsaivitsanganik.

Ammalugiallak angiKatigegutik akungani Labradorimi Inuit, Newfoundland Labradoriullu, ammalu Canada pivitsaKattisiniakKut sulitsaujunik ikajuttaugutininik sollu sukkutailinikkut ikajugiamik, ilinnianikkut ammalu asinginnik ikajuttaugutininik sunatuinnatigut ammalu aulatsilutik tamakkuninga Nunatsiavut kavamangani ilonnainik nunaliujunik atunit tallimani Inuit nunanginni.

Mai 26, 2004-mi, 76 percent Inuit angnigususimalaukKut angidlutik AngiKatigegutimik, angnigusujuit sakKitillugit 86 percentingit.

Newfoundland Labradoriullu kavamangata Illusuanga kjusittisilaukKuk Kângiutittisijet maligatsanganik maligatsatâdlugit angiKatigegutik December 6, 2004-mi. *Labradorimi Inuit Nunamik Satusaijet AngiKatigegutingata Maligatsanga* Ullusiuttaulaugivullu taitsumanitsainak ullumi.

Federal Kângiutittisijingita maligatsangit AngiKatigennimi atuinnguttitaujut
sakKititaugiamik kavamangita Illusuangani.

Kaujimmattisijet:

LIA

Jennifer Daly

(709) 753-0794

INAC

Diane Laursen

INAC Media Relations

(819) 004-2044

Elizabeth Matthews

AngajukKâsuap SuliaKapvingani

kavamangani Newfoundland Labradoriullu

(709) 729-3960 ubvalu (709) 690-5500

Lori Lee Oates

NunaKakKâsimajuit kamajinginni

kavamangani Newfoundland Labradoriullu

(709) 729-3015 ubvalu (709) 690-8403

ÂkKIGIATTAUSOT Januar 13, 2005